

四庫全書

集部

欽定四庫全書

後樂集卷十八

宋 衛涇 撰

墓誌

先伯知縣先伯母孺人墓銘

公諱時敏字子脩衛氏之先出於齊唐末避亂南遷多
居華亭至公父始著籍蘇之崑山曾祖淳故不仕祖孝
先贈朝請郎考闡故任朝奉大夫通判紹興府以公仕
贈朝請大夫妣沈氏封宜人公少有大志讀書著文紹

興中以父遇郊恩補將仕郎初任泰州海陵縣主簿次
監潭州南嶽廟次授兩浙轉運司催促起發物斛官有
詔省併再監行在太平惠民和劑局淳熙三年秋滿改
宣教郎知臨安府仁和縣磨勘轉通直郎七年十月十
七日以疾卒于家享年四十有八公娶沈氏公母弟之
子封孺人以公之喪憂感感疾越明年三月十日卒年
四十有六子四人沂渙餘幼未名女三人長許嫁進士
陳仲速孫男一人符女一人擇吉卜校終公喪之後五

月廼兆於先君墓右實湖州歸安縣廣德鄉石佛塢之
原以十年三月八日有事窆窆兩喪並舉行路之人亦
為悲傷流涕嗚呼痛哉公之行事將有文誌諸墓茲用
紀世系歲月置于隧以合葬故同其銘

先考太師魯國公墓銘

公諱某字子文姓衛氏嘉興府華亭縣人後徙家平江
之崑山曾祖某妣袁氏張氏祖某贈右朝請郎妣安人
陸氏杜氏考某左朝奉大夫累贈正奉大夫妣碩人沈

氏公生于紹興七年丁巳歲五月十四日戊寅時紹興
甲戌以正奉遺澤補將仕郎初任迪功郎建康府江寧
縣主簿秩滿丁碩人憂服除調紹興府司法參軍循從
政郎監行在草料場門避親兩易監文思院上界門以
製造玉牒儀物賞循文林郎淳熙辛丑用舉主改宣教
郎知通州海門縣郡太守於常賦外誅求無藝公謝不
能即移疾以歸踰年丐外祠主管台州崇道觀淳熙戊
申明堂恩賜五品服簽書建康軍節度判官廳公事通判

鎮江軍魚管內勸農營田事淳熙己酉及紹興甲寅兩
遇登極恩并磨勘階七轉至朝奉大夫慶元六年庚申
十一月二十七日以疾卒于家年六十四公娶章氏級
之女封安人先公七年卒贈宜人葬于湖州歸安縣廣
德鄉上沃里澱子塢石佛山之原先塋之側嘉泰改元
三月二十二日壬申奉公之柩合葬焉子男涇登淳熙
甲辰進士第任朝請大夫濟洽皆將仕郎洽以涇為起
居舍人遇上初郊恩廕補澆鄉貢進士提兩浙轉運司

進士女琰適承直郎新差充兩浙路轉運司催促糴買
官曾耆年琮適從政郎前濠州州學教授周南璩適修
職郎揚州州學教授朱晞顏適進士顧復孫男六人
樵樸樗孫女六人將葬涇等姑哀忍死姑叙鄉里世家
官簿始終之大畧屬耆年書而納諸壙若銓次行事求
銘墓左蓋有待云

先兄從事郎慶元府奉化縣主簿墓誌

吾兄姓衛氏諱沂字與叔韶訖知好學忘寒暑食飲為

文雅馴場屋不耦年三十三始以余任館職中冑子舉
又五年聯姻內宗授迪功郎主慶元府奉化縣簿余被
命聘北以守宅賞循從事郎吾兄志則自奮益剴勵於
學年四十三登慶元進士科試吏俸以郎攝邑事有能
稱尤不苟于所職邑人蒙賴無追呼橫斂之擾帥黃公
由趙公彥逾皆首薦之趙於當世士少許可特加器重
秩滿部使者亦交章薦論而遽以疾諗矣嘉泰四年九
月十七日丙子卒于家享年四十有八嗚呼吾兄早罹

艱阨甫踰弱冠連失怙恃先君愛均子姪且教之日望其有成比吾兄鎖廳再貢禮部先君尚亡恙時昆弟同試四人吾兄獨與選先君語諸弟曰若伯父有後吾喜甚於若輩為之也吾兄長余二歲幼同研席晨憲夜燈相處二十年怡怡如一日嗚呼已矣尚忍言之吾兄天性溫厚事尊撫幼孝友輯睦人無間言自鄉黨族姍凡所與遊者莫不得其驩心其不幸而死亦莫不悲傷歎惜蓋古所謂善人君子者耶吾兄積勤苦得一第謂必

大其所就而訖若是嗚呼其命耶余之哀思其何窮也
吾兄先取鄭氏前十八年卒今配趙氏故福建安撫
司叅議官不綿第三女子男三人曰撫曰楷曰槐女一
人適鄉貢進士符衍撫等以明年開禧改元月正二日
庚申葬吾兄於湖州武康縣大塢山之原以鄭氏祔伯
父任通直郎知臨安府仁和縣諱時敏吾兄其長子也
兆域相距十里許鄉里世繫伯父既有銘姑識名字行
事始末及卒葬月日納諸壙云同堂第朝請大夫新知

贛州軍州兼管內勸農事提舉南安軍南雄州兵甲公
事江西兵馬鈐轄借紫某述并書

故中大夫提舉武夷山冲佑觀祥符縣開國男

趙公墓誌銘

本朝公族之盛其在今日以儒自致者幾半進士蓋自
高廟渡江舊京近屬紫蓋而南者上每引對必勉以學
人知嚮方乾道初有以宗英冠多士孝廟寧親東朝喜
見慈顏玉音交賀淳熙以來賢才彬彬由進士出矣於

是上始有才不問戚疏之意公卿庶士州牧侯伯既拔其尤者畧用之又以遺後世子孫而使究其用故司農卿趙公其一也公諱善恭字作肅故名善儀字麟之宗正更今名曾祖慶遠軍節度使饒陽侯諱仲法娶符氏封永嘉郡夫人祖武節郎添差南劍州兵馬鈐轄諱士崧娶安氏魏氏皆封安人父修武郎累贈銀青光祿大夫諱不擇娶黃氏累贈蘄春郡夫人初士崧居官昭武樂其風土因家焉是生不擇能植立無它嗜好惟篤於

教子公居幼獨嶄然早成乾道二年取應中選兩調酒稅學益不廢銀青語嶄春曰興我家者是子也八年擢進士科授左承務郎吉之吉水丞丁銀青憂再丞筠之上高任湖北常平幹屬丁嶄春憂免喪入湖南倉幕知撫之樂安縣守潯州今上御極知邵州除大理直遷丞為郎倉部為右司開禧初元直煥章閣帥靜江魚廣右經畧改潯州尋以直龍圖閣鎮江陵除司農少卿總領湖廣軍餉攝荆湖宣撫湖北安撫魚鄂州嘉定更化上

嘉其勞就晉為卿因任踰年提舉武夷山冲佑觀凡四
奉祠十年五月十有一日以疾卒年七十積階至中大
夫爵祥符開國男戶三百服三品嗟夫公獨非兩朝之
所培育崇就魚賢與材者耶方其得百里始近民也樂
安喜訟而尚闕公曰以刑辟禁末乃繕學校先風教申
訓戒而習以草歲旱祠于巔崖躬履猿棧不憚歸未山
半雨隨之艮齋謝公諤位諫垣聞而薦賞俄守潯郡遐
土瘠歲科民竹木名修城實它用吏並緣侵擾民不堪

命公患罷去又算賦繁重有班白不敢中者公奏免之
暨移治邵陽政如在潯時獄卑滌多疾死公因囹空徙
寘之無復前患溪峒種族逼處境外曩時幸郡亡備反
側易亂公廣威信精簡閱軍實內強猛人相戒毋生事
部使者上其狀遂繇簡擢尚登用矣開禧權姦啟邊隙
公議不合即補八桂瓊筦猺陳奴期久侵擾未入平僚
佐有請兵深討者公曰是趣亂也止遣將佐盛屯兵聲
言掩擊待其自潰瓊人父母之長沙文物日殷昔文定

胡公父子遺規在焉嘗請于朝祔南嶽書院其治先後
類如此疆事未靖蘇政輦嘯聚茶陵人情搖搖公密遣
吏入賊曉以逆順政感悟率其衆來假以官秩籍其尤
剽悍者隸諸軍城邑晏然歲饑諸峒出寇掠公賙卹調
娛而監司有異己者公去而李元礪之變起矣逆曦既
授首宣撫吳公獵將入蜀撫諭奏乞公代荆上從之居
無何移武昌總餉事仍兼吳公所領節制荆雖堅城而
兵遣戍者什七八公登城慨想昔人地謂連吳控蜀奈

何以單旅徒守指衝要莫如三海顧僚吏曰吾欲築砦
瀕水以備緩急何如衆難之公力以自任不日砦成後
屢廢輒復至今賴其利先是宣威治所環以兵衛外示
威重內實怯懦公曰多兵自防非宣威意也命撤之土
豪柴俊孟宗政備料義聽節制與金戰解襄陽安陵圍
有功諸將蔽不言俊等怨望公聞之檄至慰藉賞賚有
差俊等感悅餉臺儲六路賦入江漢之屯數十萬方益
兵增戍費浩莫文前使者屢以為言公調度從容亦無

乏興至於繕列壁歸流民拯薦饑蠲苛歛皆其績効彰彰者公風儀秀整器識夷遠好學博記不妄言笑以科第致身從碩儒望士遊逾不懈故能立朝不阿臨事有斷克著聲稱以母負累朝若此其事親孝奉已約處兄弟友睦居閒十年以琴書自娛毓花疏沼婆娑其間遂老焉十月壬午葬于青雲聚水之丘公所自卜壽藏伍氏封令人前二年卒子汝例從政郎新建寧府觀察推官汝瀧迪功郎衡陽縣主簿蚤亡汝湜從事郎泉州司

戶汝渲迪功郎信州貴溪縣尉公之叔兄無嗣以汝渲
繼女適進士謝寧孫承直郎宣州戶掾鄧友直孫男六
人崇堅登仕郎崇珞崇璫崇捷崇均崇達孫女三人尚
幼某與公先後守長沙見公長嗣蔚有家法畀以京削
倦遊東歸書來請曰願誌先人之墓既辭復請乃銘之
曰

昔在中興思皇我宗保合以文蟬聯登崇乾道淳熙兩
科有公公不自伐序更民庸為郎開禧不阿故去秉旄

宅南上無南顧三邊多壘假公盡護宿飽江漢長城荆
楚惟學斯忠退不告勞位雖卿士聲烈孔昭

姪孫朝散大夫前知武岡軍墓誌銘

德章與余同六世祖而屬曾孫行嘉定壬申余帥湖南
德章時守武岡余諗于朝乞更以他郡德章慨然曰吾
仕四十年官箴惟謹未嘗苟進今老矣無能為也盍以
祠去有旨叅西浙議幙瓜問至力申祠請德章平日清
簡强健如壯年余覲其復用也既退處絕意榮利如是

者六年俄末疾以卒實嘉定己卯二月某日也其孤將以是年某月某日葬湖州歸安縣廣德鄉鷄鳴山前期以書來乞銘嗚呼德章而止于斯耶德章才氣剛直晚得一郡不究於用若尼於余乃遂其高是可尚也已德章名藻世為嘉興華亭人曾大夫某朝散大夫大父某通直郎太僕寺丞考某承務郎致仕累贈朝議大夫妣周氏繼丁氏贈恭人淳熙乙未德章擢進士第調臨安府富陽縣簿以親老改授仁和便就養仁和今畿邑仕

者趨競成風率簡忽吏事德章矯時弊足不迹公卿之
門勾稽版籍井井有序京尹王公佐性嚴重獨敬畏之
秩滿授常州無錫丞丁朝議憂再調饒之餘干丞常平
倉歲久漁蠹特甚或勸發摘以求知上官德章曰暴人
之惡揚己之能吾不為也卒為補償宰數侵之未嘗幾
微見顏面宰旋以事忤憲臺督責峻急德章從容為辨
數訖免于戾丞相趙公汝愚聞之稱其偉器薦書及格
改宣教郎知太平州繁昌縣甫四越月以恭人丁氏憂

罷尋知處之麗水麗水嚴邑素號難治且寓公鼎貴縣
有政輒掣其肘德章處以安靜邑人宜之叅政何公澹
同知葉公翥郡將胡公澄章交公車何公每曰事舉無
擾政成不苛足見儒者緒餘之效黃公何相繼出守亦
曰口不言而民自化庭不令而事自集真漢史所謂循
良者開禧邊塵驟興淮民轉徙京口毋慮數十萬德章
適倅是邦奉詔賑貸乃度地以居來者躬覈戶口多
寡而頒之粟吏無容姦流入安集郡將沈公作賓叅贊

督府列其勞上之特進一秩敵逼儀真我師退焚瓜州
老弱驚潰德章檢校所部戎器修壞完缺創蓋防江寨
宇七百楹招剌効用千數為扞禦計民以案堵方權姦
用事姻舊布滿中外長吏畏避莫敢舉職德章以武岡
陞辭入對首乞養監司郡守風采仍請撥降糴本於所
在積穀皆切時務上嘉納焉在郡平易便民不為赫赫
名民至今懷之使得攄其抱負當以事業見于世嗚呼
惜哉德章天稟純正不喜阿附方筮仕里人錢公良臣

居政路蓋公經貳版曹期相推挽德章力辭而去麗水
寓公在周行者合辭薦之時宰復以不能媚事權門安
於平進暨歸自武岡朝紳或移書勉以當路多已知且
將用公德章曰非我志也蓋其靜退之操始終弗渝故
老而益堅至蒞官以廉處鄉以和輕財重誼如恐不及
平時退然有所不為及利物濟人勇往不憚蓋非特為
吾家令子弟亦一時名勝所嘉與也積官朝散大夫春
秋七十有八娶沈氏封宜人先二年卒子社迪功郎安

豐軍六安縣尉好學守家法長女適宣教郎知寧國府
太平縣李權次適迪功郎道州江華縣丞沈剡幼適進
士劉應龍孫一人銘曰

世之降兮庶耻道亡繫德章兮謹於自將位雖不究兮
于宗有光尚爾嗣人兮庶方來之顯揚

故朝散大夫主管華州雲臺觀曾公墓誌銘

昔余伯姊歸使君時余年未弱冠間接論議風裁即雅
重君知為承家器也自有連五十年親交之義貫初終

猶一日余與世疏亢晚乃叨預大政而君獨撫然平進
于仕凡趨尚之詣理矩度之範俗盖于是益知之嘉定
壬午八月十有七日以祠官歿于蘇之常熟君寓里也
訃報余為之慟將以是年仲冬庚申舉窆事于吳南宮
鄉香山之原其大父考妣之隴前葬諸甥列泣請余銘
君墓余其何辭君諱耆年字壽翁故朝散郎權知高郵
軍諱崇之子故朝請大夫知大宗正丞諱恬之孫故朝
請大夫尚書虞部郎中諱誼之曾孫而侍中魯國宣靖

公諱公亮之五世孫也曾姓出夏少康子分封于鄆周末
國除去邑為氏孔門正傳曰點曰參皆其的系繇漢而降
派別四出始有居東南者施及本朝宣靖公起自世科相
我仁宗英宗神宗侑清廟垂太史而溫陵之曾光大矣虞
部以舊京盛時仕朝廷位省郎名稱于諸老間宗丞受
學上蔡龜山二先生氣醇而脉正以故高郵使君得以
嗣子昌吏道而典刑貽君滋弗墜也紹興戊辰君妣令
人陸氏感祥夢而君寤生離襁褓不好弄所親惟筆床

書卷甫數歲出就外傳儼如成人與其仲弟延年月相策勵期于克紹而高郵復能力貧博延儒碩以訓啟之洎長果聯貢禮部而君為詞賦第一士類到今口之若膾炙高郵卒有遺澤未任君雅志科級至是以門戶寄而令人復勉之乃拜命筮仕令人家長興則調湖州戶掾安遠次以求便親迨造官首務色養親懽矣退而畢力王事裁以庶直家法人莫知其為試吏也諸臺滯訟職此最委君察斷無留難兩造靡靡悅服當路因交剡

以聞端明戴尚書溪方主教湖學經生咸會君以餘閒
往就劇切遂莫逆于道藝中秩滿授監左藏中門纔及
月令人大故居喪毀瘠服除為浙漕糴買官君吏考已
及宜以薦脫選而泊如不為意其後紹不施而舉者交
致之嘉泰中改宣教郎權姦擅國謂忠獻韓公實與宣
靖並相先朝訪後人而得君將寘諸在列君笑曰非我
志也應令注嘉興縣以歸君三歷官僅皆掾局令宰為
近民而嘉興號難治乃一以精識強濟洗宿蠹令盡去

異時牒訴羸數百紙終君任減什七八會歲旱蝗憂不自寧履畝閱實以白之郡郡艱于蠲租則力爭得請乃已蠲數視他邑為倍民飢以紓更化初羽孽未殄上猶盱食有旨縣令得條利害君所言三事舉切時病而其卒篇謂朝廷和糴昨雖取辦嘉禾今蝗旱之餘歲且艱食加以官糴民將奔迸流徙害有不可言者疏奏朝廷聽之和糴議寢受代趨闕得倅三衢曩時高郵使君嘗丞衢之西安惠利入人至之日士民知故丞子也歡迎

恐後君佐郡有體郡所罷行平決不憚大吏衛人賴之
薦于上者加多於前人謂君華近可立取君自諗不善
于世願再領倅貳得陞建康北門體貌嚴重為貳者類
俯首不可否事君曰予通守也斯民戚休均係焉胡寧
旅進退乎遇事必極言便否餉臺審計以近制屬君有
軍吏冒請算數牴牾一見知其姦亟鉏治之使者用是
深器愛君前後登薦目不一二及是漕臣真公德秀以
耿介端莊精明峻潔薦寵抑實錄也循格當守郡得權

發遣興化軍事陸辭奏曰國家賊吏之罰非不申飭而
犯者益衆伏見州縣官吏月請俸廩州則守倅晷刻不
移縣則令丞手自預允若職幕簿尉而下長官多未之
察其無故不支動累月或暮年為祿而仕者何以養廉
雖吏之廉貪本不由此要在我待之盡則犯者可以重
寘之憲夫冰蘖其操者世復幾人惟祿足以衣食之則
苟有知者忍蹈不義乎是雖非驚時疎俗之論恐或可
上裨戒勅下倡廉潔也在蒲涉再歲扶善去惡行之愈

不疑禁兵單弱給使官吏外凡寓公舉人舊乃悉許占
借君曰邊師未班朝家縻粟以養兵而州郡之備乃爾
其可乎即以漸抽還俾復行伍非大風雨按閱日不輟
軍容為振而寓公交怨矣俄以言者去君喜于歸道逢
佳山水必登眺把酒興盡乃行還家手葺三徑自號愛
閑老人朋親相樂應接忘疲客去則盥香束書燕坐無
他營首秋偶嬰腹疾而醫療迄不效一日立妻孥曰我
大期且至平生無不了事當行即行旋却藥而逝時奉

華州雲臺祠自君寢疾若知舊若里巷故老日扣門問
安否以疾狀增損為憂喜既沒悲愴聚泣有以見君感
人之素也享年七十有五積階朝散大夫服五品娶某
先公太師鄭國公之長息女封宜人二子邲邴各預漕
薦二女適故職郎元圭繼適朝奉大夫大理少卿蓋鑄
先八年卒孫男文子文孟孫女尚幼君內稟外蹈不淪
其天孫閨門以達官政故能明倫肅括識者指為家學
中來顧亦畧用所長而惜未大其施也其餘力文詞不

為詭異而合雅正尤耽結字超悟二歐楷法至于篆籀
幾若神畫散落遠邇在在寶之有愛閑襟藁若干卷愛
閑隨筆若干卷切時之論若干卷藏于家君之不朽其
亦在斯乎余既諾諸孤請哀而銘之曰

祖有攸訓蔚粹傳兮君任君處動弗愆兮行無巨細率
其天兮未閔爾施而奄然兮慘余中腸歎逝川兮香山
之藏隴因先兮余尚銘之以永爾千萬年兮

故特進資政殿大學士程公墓誌銘

嘉定十六年四月同知樞密院程公卓以疾不能朝時
國家值仇敵百年之運疆場大計委成西府者視常為
尤劇上聞公疾憂甚中使日問狀稍間入謝重慰藉自
力就職而疾復作即拜疏言臣不幸疾進弗瘳將先犬
馬填溝壑機務至重懼不能復勝陛下委寄願上印綬
乞骸骨以六月五日薨上省奏嗟惻罷朝發賻加厚詔
有司以特進資政殿大學士告其第舉朝皆哭弔某年
某月某日葬歛縣長壽鄉龍山孫剛中以墓上之銘來

請曰先大父奮迹孤士出藩入輔名績略信于中外矣
蒙國厚恩襁往錄存哀榮畧備于始終矣惟遺耀未紀
將審所託焉幸賜之言以壽遠也予於公為同年進士
且相繼司牧于閩蓋義知公者乃序而銘之不復辭公
字從元徽休寧人望閩甚遠三世褒叙士彥太子少保
畎太子少傅世昌太子少師公蚤有絕識世父文簡公
以瓌文宿學被遇孝宗為時儒先公甫勝冠探微入窈
盡得其傳入太學試積取高等衆莫敢齒列中淳熙十

一年進士第揚州司戶郡議計民瘡積而征之匿不自
言籍畀告者公曰藏於民與儲之公等也且粟已當賦
矣征之何名帥悟而止丞崇仁縣陂旁舊有公田所入
徧甚而郡緣虛籍征于邑者歲累萬償以別邑遂寔
困公嘆曰使為此邑永患而令不得盡其愛於民者此
田也且吾誼不敢諉之令而弗顧疏其實走諸司許盡
鬻之民乃已知處州龍泉縣少師喪不行知吉州龍泉
令約而信賦緩而足廛野舒暇門堦閑寂莫識其吏迹

也有傳刃而匿其首主名不立掠治久無以具獄公屏
坐深念如或助之詰其婦曰豈嘗產怨於族乎婦謝無
有惟族父曩以地訟耳索其家衣故在泣曰妾手所完
紉也遂直其寃執政以才薦入為諸軍糧料院以嫌改
進奏院宗正寺簿奏言郡帑別儲以給公費有定制也
今恣其侈用顯賕私餉崇侈無厭宜裁約以紓民力異
駿名騅隸在親衛有常數也今齒色歲減新綱續撥纔
足相補宜課息以壯戎備遷司農丞知嘉興府近畿俗

豪喜闢稍失意則簪筆遍抵其上公以刑鉏姦以惠銷
薄從容摩揉而政以和有偽鬻印紙為左券者辭所連
逮甚衆吏白公當窮治且藉是或紓郡計公曰為之詭
遇豈不能政在安民爾罪止造者無它坐民至今德之
為大理丞刑部郎奏言國家謹獄犴而緩死則宥之以
遠今部以罷卒齎用窘絕不稍代更則往者未必生也
州縣仗胥吏而給事要以少為貴今長及子孫聲焰薰
熾不亟汰省則來者未易清也說皆施行遷軍器監庶

右司郎官權太守少卿言者不樂罷主冲祐觀起知泉州文簡崇陰猶在邦人幸公來時楮券墊陌僅及半價按不如今者急甚公以法便民而勢自通平糴舊為民擾攔米要市迂費歲月公饒所予民而事自集郡舊以銀鐐驟溢而縹緲非工詔與台信邵武昌互貢所有烹採久涸而直售數倍文簡請更定獻程而未報去之有四十年矣公曰得地利以惠吾民可也忍默默乎力為奏具言弊極矣惟垂裁朝廷尚難之繼公者復助之請

乃皆聽可於是累年之弊革矣移提點福建刑獄民留
像以祠攝帥事直秘閣為真郡負海暴桀推埋公追迹
名捕空其巢貸所騫汙者為之振業境內奠枕健吏武
譎宿姦如山公戒僚列悲意首公事無落吏手過期會
迫猝纔留一二旁立待命具筆牘行文書而已閩素多
士公在泉新美學宮至閩更舊洗陋如泉時又崇峙儲
廩增貲以養而呻誦滿廊戶矣課縣籍計日勾稽而復
賦謬輸皆釐整督曹牒應時剖奪而新爭故訟皆縮却

又條便宜數事欲以治邑之殿最上之銓部為升黜覆
獄之能否載之印歷為勸懲幽繫之無所廩食者取之
常平以寬瘐死伉勇而熟於水閫者傳以海道以戒不
虞上供間出於僧坊則豪右勿因以貸息租銖盡歸於
吏攬則官府勿重以漁奪蓋其勤苦在民疊疊一意審
其痛毒時其安便苟有圭撮為利者無不為也寸尺可
効者無不竭也召為秘書少監論諸將酣豢於富貴精
銳銷落徧裨後起奮達無路不加搜採英豪坐老矣軍

籍溜蠹於隱占十幾四三贏糧剝錙脂腴一將不加檢
質餉計坐失矣泉貨以權輕重通有無也今洩於外毀
於器不急救之殆將日少願詔鍾官魚采鐵錫以資冶
鑄上嘉納且曰何但於少遂將無矣遷起居郎工部吏
部侍郎奏言擇守在牧養當後資格選將在備園當先
准堽民餒而怨困於折納者當使絕息將愚而貪習于
朘削者當示威懲財窮于兵當節浮冗法壞於例當抑
僥倖進給事中言臺臣坐貪穢敗不可與貼職宗子以

殺人抵罪不可貸同惡其隨時舒吐無所回隱而志以
伸引議規切無所阿徇而論以盡皆類此自嘉定初忍
垢講和我幣歲入未幾彼有外患因自絕甫定則復請
賂公前在郎省以選往賀正旦還言彼寇深仇結燼餘
幾何潰叛四起矣而猶暴骨以逞兵不足恃也禍稔彰
聞歲不為稔粟直萬錢矣而猶讐飲以供民不足恃也
願益講修攘之策以待天意之定上說始議與北絕矣
在我監言兵法先計後戰敵遁誅已久願咨逮戎畧首

未皆許圖上擇其可者而咨度焉若臨戰而計則無及也及是進李德裕籌邊事又言敵亡無日矣困獸猶鬪蓄力運智事宜在蚤前後極言邊事常欲以暇應猝以弱就強圖易于難而無麗武以冒進慮動于靜而無安恬以玩敵累疏一意也上既默許任屬進貳密院于是敵勢日蹙孤懸一隅爭倒戈奮擊舉地奉琛而歸我天下翕然望中興矣公憂邊思職純識獨到念蠱毒未易輕則勢之廣莫者尚費完守狙伺未易測則情之攜異

者尚勞控馭宿將前望坐相視盡幹方禦侮誰與謀長
所謂邊境安危之原慮方深也是以荷上簡擢凡所以
審智計廣忠益練才實緝事幾者顯贊密扶愛日惜陰
冀行其所知以圖永報惜其歲月之近而不究其材也
公宿道以婉養德以冲自幼內行淳備少師持家嚴甚
公以孝敬盡瘁無情色共爨總者幾數百指公以愛友
成熟無間言勇于矢義勢雖險不為懾費雖鉅不為嗇
故舊歿無以斂公為倒奩空楮以助且經理其家在大

學同席者歿于疫相率委去公挾醫護視不輟晨暮卒
賴以生與人謙以裕奉已約以清雖貴不改其度宴士
寒品酬接盡禮所居增一樓儲書一堂燕坐而已嘗曰
富貴非可力求寧遲其自至蒞官則先以廉勤吾所以
寡憂患者以此爾子孫守之謹勿渝也異時喜誘掖後
進酬義侃侃屢滿戶外因所需溉率皆有立雅不喜言
人之過才長獨藝曲借聲價因所鑒許率皆知名誦樂
天詩慕其為人所居西有林壑之勝暇日從賓御短棹

倏往命雲侶月觴詠悠然其澹于榮利不以軒冕之味
而遂忘也奏議十卷文集二十卷年七十一夫人朱氏
封齊安郡君有賢行先卒子以思監西京中嶽廟以過
毀得疾後十有一日而卒江陰縣尉朱立已知丹徒縣
姚元特其婿也孫剛中監西京中嶽廟孫婿旌德縣尉
汪耒惟新安介在江左修岑絕巘透高入雲奔湍濯流
倒注萬仞其靈邁肅潔之氣鍾美于人則言論風猷多
以諫官御史有聞于時若夫砥節者傷于孤簡瞻智者

過于深刻非人美于地則未有能以義而勝俗者公雖以冰玉自潔而揮斥崖谷無岸異嶄絕之行人樂其平粹雖以穎銳朗出而洗削纖巧無枝葉華蔓之迹人信其篤厚故立朝不過崇懇激而周盡雅俗如機湊的言皆可以長國居外不廣植聲威而坐燭幽隱如鏡見象事皆可以庇民庶幾獨鍾于賦予之全者銘曰

惟天降才稽德則均借美于地或庇其醇惟公懋德自為芳馨疏介以通蘊高于平有球彼至薦以廉清如琴

斯希寂涵至音有謨在國有澤在民以雅伸俗以實遠
名三事晚矣噫難者兵謀胡忌蚤憂奚厭深徹土未陰
效遠而近孰盡其能孰嗇其成蔚兮朝隣龍山之垠俾
來者誰尚比斯銘

安娘壙銘

安娘某之第二女也生於慶元丁巳甫十歲夏中忽得
疾呼小方脈診視曰此伏暑中風吾業醫舊矣二十年
間未嘗見童幼有此謂比歲乃有之且多作于立秋前

後十日病者十不療一二其不死者亦不復全人豈亦
關氣數耶吾女初苦壯熱幾旬不解屢投涼劑大腑通
利熱既退而右手足緩弱纏綿二年餘嘉定初元吾罷
政歸時適盛夏舟中再冒暑毒還舍旬浹疾作遂歿年
止十二嗚呼是可哀也後十八年乳母楊氏卜葬茲地
因祔于側且刻歲月納諸壙

徑山蒙菴佛智禪師塔銘

慶元丁巳夏徑山寺闕住持有旨以命僧元聰後數年

寺燼於火不二年元聰新之視舊觀有加焉寺既復元聰引去上復以往持命之且為御書寺額及蒙菴二字賜之仍賜號曰佛智禪師嘉定己巳十一月十一日元聰示若有疾以偈入奏其畧曰溫滅本來同盡在吾皇大海中及有願延睿算等語越四日元聰逝去事聞上特降贈金遂以是年某月某日某辰入塔于蒙菴之原某時伏在林野耳剽是事竊深敬嘆主上待遇臣子恩全始終其施于元聰者猶若此元聰以寂滅為學至其

垂歿必以祝聖人壽為言予以見君臣之典窮天地而不可泯者如此欲私記之未能也未幾其徒狀師之行求塔銘于某乃以所聞識其首而後次序之曰師姓朱名元聰字蒙叟福之長樂人母房氏以慶壽恩封孺人師少穎慧習儒年十九始去儒入釋初從龜峯僧璘游璘歿則從晦菴慧光學陳公康伯一日至龜峯見師于優婆塞中小異捐金俾之買僧牒師既落髮乃白晦菴曰元聰身了而心未了望和尚免以事役晦菴笑曰佛

法在尋常行履處何懼事奪耶今限汝一月心如不了
即有決罰師歸僧堂書晦菴語于牕紙脇不至席者半
月幾至欲狂晦菴日使人視之忽聞其有啜泣聲亟呼
之前曰啞壞了汝師對曰昨日聞父訃不克歸學佛無
成恐兩下俱失故泣晦菴連搥師三掌師頓有所悟衝
口呈頌了了了徹底了無端赤脚東西走踏破晴空月
一輪八萬四千門洞曉晦菴曰且放汝三十棒師云元
聰亦放和尚三十棒自此機鋒濬發境徹理融乃辭晦

菴往諸方勘辯逮晦菴住法石師隨之為侍者晦菴臨終以行雪堂所付法衣付師書示衆曰再來毒種元聰巨耐吾宗滅汝邊也法衣一條聊分付聰子時搥塗毒鼓師拜而受之叢林遂有毒種之號晦菴既終泉守周公葵首請師住清化師以晦菴常戒其年未及四十不得出世辭之即日攜晦菴骨歸葬龜峯道過福之乾元時木菴道永方峭立崖岸師徑造其室木菴云莫即是聰侍者否師稱名木菴曰此事非聰明所能辦師云通

身是口吐不出木菴云中毒了也師云莫掩彩木菴曰
須知此事不在方策上不在口皮邊師云畢竟在什麼
處木菴曰鐵蒺藜當面擲師云大好不在口皮邊木菴
肯之其深禪密句多此類有語錄傳于世師既薨晦菴
即往見密菴咸傑於焉巨見且菴守仁于長蘆又見瞎
堂慧遠于靈隱見水菴宗一於淨慈又見誰菴宗演于
高亭佛照德光於光孝復菴可宗于保安以証其所得
逮密菴遷徑山師為第一座由是聲名益起四方衲子

皆宗之錢公佃將漕江西首請師住隆興光孝師辭之
張公子顏為江西帥又欲以光孝處師知其不可屈乃
貽書密菴俾勉其行師遂自光孝開堂為晦菴嗣至是
師年四十矣未幾饒之薦福撫之漕山洪之寶峯爭欲
迎致師師皆不赴江東帥留公正轉運尤公袤丘公宥
前後凡三請師住雲居師亦三辭之一日憲使趙公暕
俾南康守錢公聞詩詭作民家請說法道過廬山遂遞
留師于雲居一住九年百廢具舉鉗錘益密爐鞴愈高


趙公汝愚始當塗以隱靜招師師忻然從之外戶為之
屨滿未幾平江之承天常之華藏真之長蘆同日轉使
至師曰吾緣法自長蘆往雪峯徑山遂往長蘆已而雪
峯果虛席福建帥詹公體仁會諸禪探籌一探而得師
名遂以聞于朝師欲因之省母亦不辭而承命遂往雪
峯三年自雪峯過徑山凡坐十四夏因回祿之變築屋
甚廣事見樓公鑰所為記又傾橐蓋田足以安衆師持
身精勤接物弘大生機硬語直指人心禪徒之奔徑山

遂不減大慧盛時至于五緣俱契諸福具全又若默有所助云臨終既奏遺偈又貽書別常所往來者其弟子環繞求語師皆隨根器授之最後辭大眾曰來未嘗來去未嘗去七十四年月印寒渚遂擲筆趺化人以為國一後身僧臘七十四度比丘二百餘人嗣法若行謙元詔可達南悟端仁輩凡五十餘人它日必有聞于世者師滅之夕大風拔林瘞骨之日久雨頓霽是夜塔現祥光空中出金磬聲初范公成大與師厚至范公欲得師

住承天則師曰願從公杖屨行不願承天也范公每謂
師墨名而儒行故余因范公知師甚詳及觀師之終始
一念於君師父母者則范公之言信矣然獨於聞父之
喪當荒迷之中反有所悟入則佛者偉之而儒者疑之
豈亦所謂生於憂患者歟銘曰

人生而善有萬惟均能盡此性拔夷冠倫在吾為仁在
佛為覺理本不殊殊以其學蒙菴之覺匪覺伊仁君師
父母仁之本根末法波流紛拏口舌孰知此事初無異

說龍門雪堂為法棟梁燈翳而吐由師乃光孰振徑山
孰扶佛智我撮其實天子之賜



欽定四庫全書

集部

後樂集卷十九

二十

詳校官庶吉士臣翁樹培

主事臣呂雲棟覆勘

謄錄監生臣李光緒

欽定四庫全書

後樂集卷十九

宋 衛涇 撰

祭文 祝文 雜文

祭何澹文

嗚呼近年輔臣行輩蟬聯惟公終始身名泰然如青天
白日之無滓如黃鐘大呂之在懸豈非重厚足以鎮俗
知識足以知先文不特魁南宮之多士而足以華國學
不特備九重之顧問而足以鈞玄所養足以動人而悟

物所運足以持危而扶顛若抱黃河泰山所鍾之秀而
得三光五嶽未分之全也故其兩升中司風望肅整徧
儀二府樞機密旋揚休山立之色久輝映於列辟金鏘
玉鳴之論常宣暢於上前人莫窺其涯涘已獨妙於眇
綿去中台之咫尺邇長風而孤騫若掉富貴之鞅不急
功名之鞭出分兩鎮歛惠十連俄急流而勇退欲西陌
而東阡賦歸來兮一紀快步武兮蹁躑樂竹宮之高寒
尋香社而盤桓冕旒簡注為三朝之元老搢紳具瞻為

一世之大賢方藉黃髮星弁之重顯俟衮衣赤舄之還
胡虬糠於濁世竟凌厲於飛僊濟川之舟夜移奠楹之
夢已傳有來我門忽墮遺牋驚讀妙墨泣涕漣漣自惟
疎遠素辱知憐方時多艱宿師三邊本兵之地安得再
借疇昔折衝禦侮之力留鑰之都安得重煩向時治軍
振旅之權括蒼摩雲鼎湖接天公有精爽凌風跨煙尚
其髣髴來舉我邊

祭吳侍郎獵文

嗚呼士生尚志蓋在弘毅豈無它美皆德之細公生也
厚金玉之粹蚤從明師講道養氣尊其所聞名高自畏
自厯小官厥臨孔惠中登臺省望駿於位晚為國計邊
患方熾守荆諭蜀不以難避士皆期公廊廟之器一閑
四年竟作長逝嗚呼尚德好善孰如公之恭且懿也憂
國愛民孰如公之篤且至也傾已下士孰如公之坦且
易也親仁急義孰如公之勇且銳也天不憖遺國用殄
瘁某守此邦感德無地有旨者酒有汎者淚死生交情

辭不盡意

祭邱樞密密文

嗚呼自昔賢哲死生之變有關於世道之盛衰夫受才於天者既宏則貽福於斯人者當大其所施曠間世而始鍾胡一朝而永違信蒼旻之難詰使黔首之疇依公之堂堂萬夫桀規喬嶽屹鎮景星燦垂厯事三朝屢更險夷惟真弗渝惟堅弗隳或出或處一節靡移銷伏羣枉斷制大疑人有元氣國有址基邊陲倣擾呼吸安危

身為長城手摩瘡痍明堂一柱泰山四維物望紛屬璽
詔交馳庶幾大用抗函力歸云何微疾乃不憊遺某蚤
從幙府已辱顧知晚荷情誼屢見書辭俛念愴然意繆
所期馳奠寓誠匪勤其私

祭譚參議文

襲慶將門服勤儒學及師東萊所見者卓七捧能書遂
拔頭角鳬寫一飛虎符再握漢庭用老采玉遺璞使客
諸侯落我帷幄克同寅恭有斐瑳琢如何繁霜闕此蘭

葯幕中之辯孰揚孰權老成日凋典刑日斲公亦往矣
誰返其樸遺詞寫哀有泗如濯哀哉

又

沂水望族山西將門業受東萊學有本原七薦賢書南
漢化鯢舍武而文金友玉昆旋紆墨綬洊擁朱轡晚辭
英蕩參幕湘南論議老成德齒達尊余所嘉賴有光帥
垣一疾遽嬰曾不控冤談笑幻泡達人觀嗚呼玉樹
之摧雲愁晝昏景寂溪堂詩遺夢庵典刑儼在胡然九

原文以寓哀聊薦一樽

參議所居有溪堂所述有夢庵

祭運使蔡大博文

惟公行不為崖丈不為塚由外考中可以洞見遇事而
決剛也百鍊味道既腴其瘠靡變需而為澤剖符擁傳
清廟將歸為玉之瑱胡然一疾薨弗及嘵好同寮寢居
接里縣疇昔之夜笑語繾綣倏如遊飈疇不驚眩古人
云亡善將安勸西江有波清酒可奠

又

嗚呼公乎去將安之春江水生大波倒吹蛟鰐之時嗚
呼公乎去將安之萬山一蹊天黑虎躩荒驛風飈嗚呼
公乎盍亦留諸維南有浦可釣可詩厥產魚稻民秀風
熙或臺於顛或苑於涯是燕是宜公乎留斯朝與雲來
暮與雲歸叢祠香火鄉社豚犧我民其兒公乎留斯有
轡於軺有翼於帷公不我留我涕漣漣實穀在俎醜酒
在卮死生交情公勿吐之

祭周通判文

藩條之寄舊號繁劇貳車得賢允有裨益我來甫爾公
已云亡雖欲不傷如之何而不傷

祭雷叅政孝友文

惟靈逢時休明高步騰驤任大司成文明對敷擢中執
法扶持紀綱開禧之末於赫陽剛公於是時白簡凝霜
政化既更治具寔張股肱以輔羽翼元良八年於茲庶
事用康九重眷遇一日靡忘祈解機務濟貢封章溫詔
勉留莫挽歸裝進職延恩出牧藩方渙此異數實維非

常尋以訃聞帝心盡傷亞保之崇褒贈是將哀榮周備
命數焜煌某頃塵近列接武周行今守江右咫尺鄭鄉
引睇山川出雲之祥尚期霖雨惠澤八荒豈意歸柩道
由南昌涕泗交頤敬酌一觴

祭王少卿母太碩人文

柔懿維則壽考且仁肅穆婦儀光於德門篤生賢子秉
是正直載旌萬里名震殊域挺挺風烈忘身徇公猗歟
母訓實維教忠自鎮神臯晉貳卿寺榮奉板輿有華綵

侍象服魚軒曷不百年嗟嗟淑德云云逝川瞻睇慈幃
登拜弗及菲奠寓誠涕泗於邑

祭安康郡太夫人章氏文

嗚呼彤史不作懿範罕聞孰如安康蔚其清芬齊家睦族
曰儉與仁念我疇昔實蒙拊循及以女歸恩至且勤飲
食教誨母慈則均餘四十載追惟若新邇者菜衣出守
江濱就養以行以榮以欣旋乃違豫還息里門相彼異
稟樂喜可臻云胡不淑荒厥澗蘋重念幼子冠而未婚

治命炳然許妻以孫方將卜吉用永世姻庶幾魚軒復
來顧存歎昵讌語朋集賓親奄忽仙去有懷曷伸惟古
五福全者幾人孰如安康備於一身繙繹貝葉久悟性
真死生之變等於浮雲哀榮始終奚憾幽宅我獨感舊
隕涕沾巾曾是哀繭奠酌莫親敬飭二弟往薦斯文

淮東提舉任謁諸廟文

天子臨軒遣使凡部封之內事之利病民之休戚吏之
臧否皆得聞焉其任顧不重歟某承命此來大懼弗克

勝任惟神聰明正直血食此土

一作受職此土

使者顧相與表

裏焉以無負臨遣之意神之所宜鑒也禮有常謁敢先

厥初

又

竊惟有功於民者悉在祀典聰明正直以福是邦視事之初敢不祇告惟神其左右之

東海提舉任謁殿文

夙夜出納命於虞書周爰咨詢播之詩雅使者之職其

來尚矣厥令倉廩之儲山澤之利雖事任不同而觀風問俗之意則未遠也某起自諸生出將使指置司之郡禮有常謁佩服古訓敢告厥初

潭州到任謁南嶽行廟文

南方之嶽是為衡山衡有平物之功嶽有鎮安之義此銓德鈞物之權實帝攸司而節宣風雨庇蔭生人所以為此邦之福也某分捆於此密藉神休祇事之初敬謁行廟惟帝其陰相之

辭殿文

某猥以諸生濫與將指朞年於茲體學道愛人之念佩
行已有恥之訓蓋願學焉而未能也蒙恩易節方旬祠
以歸屬有行日敢不祇告

潭州謁殿文

茲分帥閩兼領郡符惟宣聖之訓是遵惟斯民之務是
急莅事之始吉蠲以告亦曰千乘之國敬事而信節用
而愛人使民以時聖有格言某敢不勉

潭州時祭南嶽正廟文

於皇喬嶽奠居南服人無疵癘歲有豐熟守土蒙成皆
帝所福以時修報祭不敢瀆

潭州準郊赦祭南嶽行廟文

聖上明德恤祀至誠感神侏祗郊禋穹昊饗答熙事告
備沛澤旁流申命守臣聿嚴祀典蓋所以廣天地之仁
而同幽明之慶也嶽為百神之宗南土之望躬飭明薦
罔敢弗虔唯嶽有神尚其鑒之

潭州時祭南嶽行廟祝文

嶽宗百神鎮此南土潭之為郡密承帝休祀有彝儀尤
嚴冬報守臣庀職敢不告蠲敬謁行祠以祈鑒佑

又

維衡是嶽雄鎮南服睠此熊湘實嶽之麓民和年豐皆
帝所福禮嚴冬報敢不祗肅

又

春首四時祀嚴八政當春而祀郡有彝章維嶽鎮南衆

所怙命吉蠲明薦罔敢弗虔惠相我民實惟神賜

又

天下五嶽衡居其一載在祀典有文有秩某自領藩條
春事載及時和歲豐民用寧壹惟帝惠相既昭其實敬
治潔蠲期保終吉

謁眞武祐聖廟文

竊惟眞君以治輔正以福德民聖天子以閭外寄某亦
欲其扶植正類以為編氓之福耳祇事之始敢用昭告

惟真君其默相焉

潭州謝雨文

徂暑未闌慮或愆於亢旱精神方啓響遽答於甘霖既
屢慶於豐年尚敢忘於去日伏念臣某恭承龍渥久鎮
熊湘志在乎民每勤拳於雨若政先於食惟冀幸於秋
成庚伏正中午陽方熾禱嘿孚於一念應靡俟於崇朝
未適西江尚見三登之盛載祈南楚騰騰百室之歌

辭殿文

某聞敬事而信節用而愛人使民以時惟先聖所以教
邦諸侯者如此某諸生也從事斯語獲免於戾繼自今
尚當終身誦之以不負所學告而後行如初禮

辭南嶽行廟文

某猥以非才來守茲土比及二年凡所以陰隲下民無
水旱盜賊之憂而使某得以展布四體行君之令者惟
帝是怙今叨易地泝江有日敢以此心質諸神明而後
問津焉

隆興府準明堂赦祭諸廟文

歲事合宮禮既行於三載流恩寓縣祀咸秩於百神恭
奉德音肅陳芳薦仰祈昭鑒顯賜迪嘗

隆興府社後祭諸廟文

風清露潔秋過半兮民免啼號誰之賜兮報禮有常吏
敢後兮牲幣既豐酒則旨兮馨香所薦來盼饗兮永佑
我民被凶咎兮

社後祭諸廟文

倬彼甫田其耕澤澤勞農勸相實吏之職風雨時若疾
沴不興陰相嘿佑惟神之靈時殷仲春恪修常事徧於
羣祠以享以祀神其茫貺惠我豐年指日秋報吏敢不
虔

時祭諸廟文

禮有功烈於民則祀之矧今歲事告成昭報在冬郡有
彝典欽神之休以介終惠惟聰明其鑒之

又

其自領帥閩歲游易春疵癘不作豐稔相因陰助默佑
亶惟有神嘗觀禮典法施於民禦灾捍患祭祀惟均敬
展春祈侑以此文

隆興府吳城山龍王廟祈晴文

惟神興雨成雲變化無際時則為澤過則為沴方旱而
霖物蒙其濟方獲而潦害且不細嗟我農人當此歛穧
零雨其濛終風且暄並走羣望決旬未霽築場納禾公
私所繫下奪民食上妨國計惟爾有神廟食世世害於

染盛胡然供祭爰即祠宇肅陳牲幣亟導晴曦盡驅陰翳收斂神功以須嗣歲

隆興府謝諸廟文

獲稻納稼茲維其時農將赴功而雨妨之吏患其然敬請於祠旋惠以晴有如所期歲事備收厥賜不貲遣吏以謝神其鑒茲

隆興府龍王廟禱雨文

鶴鳴垤而零雨望切輿情龍嘘氣而成雲敬申誠懇乃

四月之維夏正三時之務農膏澤少愆歲事未卜惟神所宅實福此邦儼威靈於今古之間妙變化於須臾之頃用遣一介之吏虔修百拜之誠願施陰陽開闔之權亟下風雷鼓舞之令大為霖於三日以加惠於一方神無常享於誠少鑒微衷之請旱不苦禱而雨庶幾循吏之風

禱風雨池文

大旱之望雲霓於民心而甚切祈雨以介稷黍在吏職

以敢安誠恐未孚禱猶莫應凡有新禳之典悉殫真切
之誠乃眷靈湫比加顯號由積功烈故被寵光方仲呂
之載臨適當暘之為沴苗則槁矣人皆仰之敬為千里
之民庸遣一介之吏歷陳悃悃恭扣陰靈願於呼吸之
間亟下風雷之令大為霖於三日以加恩於一方百畝
之田勿失其時正當夏長一年之計在於種穀庶遂秋
成

又禱風雨池文

早既甚而滌山川寅奉責身之詔雲能出而為風雨敢
稽走望之恭惟吳源之赫靈至李唐而彌著有旱必禱
隨感而通張曲江甘液之詩權文公時雨之記一時答
貺千古流芳顧拙政之無堪視前人而有愧念聖主軫
憂於宵旰而藩臣若履於淵冰恭即靈湫浚申誠悃願
以一勺之水需為三日之霖神既賜於豐穰吏敢忘於
昭報

庵山廟祈晴文

嗚呼穀自布種下秧以至於秀實其成之艱矣農自于
耜舉趾以至於刈獲其致之勞矣忽雨不止坐妨收藏
嗚呼成之艱致之勞者豈不甚可惜乎天乎神乎忍為
之乎某憫農夫之勤苦悼小民之怨咨耳簷溜如聞啼號
目嘉穀如割心髓奔走羣望未臻嘉應惟神受百年血
食之奉主一方雨暘之權用敢躬謁祠下稽首祈哀神
其驅掃陰霧軒露霽華既全歲功亦活民命

蓋竹廟祈晴文

嗚呼成一歲之稔難為數日之晴易畀其難者而不畀其易者豈神有愛於民歟抑吏之不肖無以媚神而然歟吏知罪矣雖然雨不止穀不收歲荒民流上帝震怒吏且誅殛則凡血食於此土者其得漠然無情哉闔陰闢陽披霧出日在俄頃之間耳敢奉薌幣以祈

辭殿文

某守藩南州閱歲有半節用愛人之語雖未必能盡行而居之無倦行之以忠蓋終身誦之也去之日不敢不

如始至謹齋潔以告

福州到任謁殿文

某恭承皇命移鎮此邦視事之始謹齋宿以祗見於學
宮惟是從政之方敬事之義平昔之有得於格言者其
敢不允蹈之

福州時祭諸廟文

祭有常序祀有常儀率循以行其敢不肅惟是若雨暘
蠲災沴以陰佑乎民者神亦有常職也顧神其垂鑒焉

又

神之在祀典者為其有功於民也率時春祠在吏有彛敬矣相予歲事惟神其克鑒之

福州準郊赦祭諸廟文

聖上秩盛禮於泰壇衍洪恩於坤紀申命守告於羣祀蓋欲幽明兩間均此大慶也唯爾有神尚克鑒之

福州禱諸廟文

百穀用成奄觀銍艾乃秋之杪淫潦為害黃雲滿野一

飽是期壞於垂成神其惡之吏親於民莫或違處齋祓
乞靈奔走祠宇驅除陰沴導迎秋暘成此歲功報祀敢
忘

又

水歸其壑冬月之常儻天時之雨溢實收斂其有妨今
者雷宜伏而時作霓方徂而未藏惟神依人而行其亦
式赫厥靈亟與排積陰而升太陽也

禱鱣溪文

旱而禱雨正沾足以為期時尚屯膏意精神之未格輒以羣生之望而忘再瀆之愆惟爾神舊號於靈源凡故老能言其響應願從今後四滂沱以流恩毋若初祈一沾濡而斂惠

謝鱖溪文

一時不雨已再控於禱祈三日為霖俄遍敷於膏潤載觀感通之速遙知變化之神適是承流其敢忘德願從今始曰雨而雨曰暘而暘式赫厥靈潛天而天潛地

而地

辭殿文

千乘之國治有要道敬事之外節用愛人某尹藩弗績
易地來閩行無越思維聖之訓暮年於此上下相安以
疾丐辭累牘得請謁謝而去聖師鑒之

福州辭諸廟文

某易地閩徼俯仰彌年拙政平平初無偉績年穀順成
田里晏靖匪神陰相曷濟登茲祝釐得俞從容引去吉

蠲以謝靈娛嘉之

隆興府再任謁殿文

某曩者叨臨帥閫正以諸生伎短退懷愧慊今拜申命敬用躬謁臨事而懼洙泗格言視民如傷澗瀍遺訓敢不敬承

隆興府再任謁諸廟文

某昔者被命作州仰藉威神之助幸逃曠敗今被新組載臨舊封惟是默相俾寒暑調而雨暘順使某得以體

上意而寬民力是所禱也

隆興府釋奠五賢祠四首

西漢南昌尉梅福東漢處士徐穉東漢豫章太守陳蕃晉豫章太守范甯唐江西觀察使

章丹

五公之賢邦人是祠從祀於學有嚴舊規共命復來適維其時酌奠以告敢不肅祇

又

嗟嗟五公相去千載碩德偉望表表在人列祠學宮以

明有敬迺釋奠已率由舊章爰遣僚吏祀以時禮願言
顧之式副詠思

又

逸士之高風循吏之善政皆可為百世之師故廟而祀
之牲酒潔蠲庶幾來格

又

籍甚遺愛藹然清風人心歸向萬古攸同巍巍象設隣
於學宮崇盛牲醴既潔且豐春秋奠饗普宣無窮

隆興府禱雨諸廟文

惟神血食茲邦不知幾百年矣而吏於此者朝往暮來
不一二年而去然則神與吏之於民孰為最親去此蓋
五年誤恩復來逮茲歲除甫視郡篆未獲奉牲漑酒致
告於神遽有祈焉世謂臘前三白豐年之祥今臘無幾
日歲將及春霜乾彌旬積雪不下旱蝗為孽慮在嗣歲
某竊憂之未及下車敬為是禱神其布彤雲噓朔風俾
剪水飛花臨風舞絮庶幾民有豐年之望無疫癘之虞

實神陰相吏亦得以辭其責惟神其鑒之

謁廟文

某奉天子命分閩茲土鎮撫方面牧養小民某之責也
雨暘以時疾癘不作神之職也視事之初齋心以告惟
神其克相之

春祭文

春主乎生草木萌動發榮吐秀神實司之於春日而舉
彝章用不敢怠長我百穀育我庶民郡守之望於神者

宏矣肆其相之

又

令肇青陽滋生萬彙爰卜茲辰俶興穡事唯爾有神尚克
相畀庸薦嘉穀式修彝祀

祈晴文

農家作苦稻漸登場淫雨為災穗將生耳為黎元而請
命望穹昊以輸誠伏念臣初領郡符敢逃吏責教條未
具莫臻天地之和刈穫有期遽爽雨暘之節積為霖潦

害及染盛用是隱憂莫遑寧處靡神不宗靡神不舉尚
冀感通惟天為聰惟天為明輒申祈禱願回真造俯鑒
微衷縱諸陽閉諸陰盡消沴氣崇如墉比如擲共樂豐
年

禱雨文

吏蒙恩於朝布宣德意神受命於帝協贊化工均食於
民各揚厥職如政刑之有爽吏敢辭其愆若雨暘之不
時神實任其責方四月之告早仰九重之軫憂爰飭庶

邦徧走羣祀取一勺之水可以資羣龍之變化注三日之雨庶幾蘇百姓之焦枯吏固得以藉神之休神亦可以承天之意

龍潭禱雨文

允月之收成在邇正切望霖屯膏之沾潤未周若為蘇旱輒指潛珍之所虔伸需澤之祈其始自今毋時或愆噴泉溪畔早騰變化之蹤報雨峯前亟布沾濡之賜歲其克稔民敢忘休

皇子百晬淨髮文

伏以天開蕃衍時對長羸續蒼宮之震索迎朱陸之離
明燕應祠而垂裕熊協夢以儲精啓瓜瓞之昌盛顯朱
官之和平秋序踰半晬日就盈承璇源之帝錫藹玉稟
以天成備儀屏幄臨深謀屏喜溢椒庭之邃香浮蘭液
之清拂紺髦而雲委呈寶鏐以霜凝善頌交集嘉祥適
膺茂覃訃之粹質永耆父之修齡奉慈宸兮愜懌聯華
萼兮輝榮受百福兮穰穰簡簡繼多男兮蟄蟄繩繩

潭州勸農文

勸農必以歲二月故事也太守到郡嘗勞父老於北郊
矣視事既久益習知民俗利病今復進父老而告之豈
特勸耕循故事而已思求夫害農者併以告焉乃者兵
事既息民得安業歲仍小熟天實相民今東作方興霪
霖霑足深耕易耨不勞爾力天之相民又似可卜然水
旱之數無常天時不可數恃惟在勤苦可望有秋湖湘
之俗素號淳樸非有游觀侈泰之欲以蕩其心非有工

械伎巧之蠹以分其力民無末作多事南畝農田之利
宜自知之太守所慮在於妨功害農之習陷溺其中或
不自知也好訟終凶大易所戒出入州縣遠投監司拘
繫囹圄涉厯時月宜無妨功害農者乎父子兄弟親戚
隣里根連株連動以十數豈無妨功害農者乎日閱訟
牒每每嘆息偶涉絀誤百無一二率皆故違義理明犯
禁法自抵罪辜而不知悔如忿心所激爭鬪所不免也
今或十金之未償或一語之不順便相殺害不死不休

累及干連蕩破家產此爭鬪之害一也貧而失業典賣所不免也今或已絕而言典父賣而子贖交易年深尚訴準折契要明白堅執詐偽富者吞併則以倚富為典賣貧者昏賴則以典賣為倚富交相論訴不顧是非此典賣之害二也爭田者不明指所爭之因但以強耕盜種劫奪禾穀為名爭地者不明指所爭之界但以發掘墳墓暴露骸骨為主苟欲動官司之聽不知蹈誣罔之刑此詐妄之害三也豪民放債乘民之急或取息數倍

積日累月或託名典本筭至十年奪其屋使不得居奪其田使不得食流離困餓曾不之恤此債負之害四也至於強暴之男略人之妻以資嫁賣富豪子弟誘人之女以為淫奔大辟具獄因姦者半風俗不美莫此為甚此誘畧之害五也其他訟事未能悉舉守令承流宣化教民易俗今其若此責將誰歸姦宄起於貧窮禮義生於富足故願父老轉相告語率其子弟勤身從事益務本業凡此弊俗宜痛革之豪家大姓存恤小民客主相

資貧富相養家給人足各相親睦忿戾不生爭訟可息
還淳反樸庶有期矣若乃追呼之煩以奪農時徭役之
重以傷民力則守與令責也咎實在余必不汝諉父老
幸聽毋忽

又

勸農以文不若除病農之實太守去歲出郊蓋嘗與爾
父老言之此邦接湖北諸邑昨以旱告太守既為爾減
租發粟矣然田租可寬而難於盡捐廩粟有限而難於

徧及所幸上流小稔彼此通融方春東作穀米價踊勤
身從事爾農顧不當力以此自勉歟雖有饑饉必有豐
年此天理也良農不為水旱輟耕此人事也人事既盡
天理自還太守去此有日矣敢復以是為爾農告

隆興府勸農文

聖天子寬仁節儉愛養基本爰命牧守共理爾民而專
領農事方春之仲太守祇奉國典親行近郊進父老而
勸之非特應故事而已夫空言莫如實用率下莫如正

身太守視事以來宣布德意勤恤民隱一工役不敢輒興懼其奪民時也一獄訟不敢以淹懼其妨民事也均折變之額懼下戶之重困也嚴受賕之禁懼姦吏之侵尅也凡有可以寬吾民者不遺餘力矣爾民可不思所以自勉乎去歲賴天之休雨暘時若他郡或憂旱而此邦獨不事於桔槔他郡或秋澇而此邦獨不妨於銍艾歲則大熟粒米狼戾雖天時之適然亦力穡之明驗也方春東作以興嗣歲可不益思所以勉之乎人皆曰穀

賤傷農以其價直廉而錢少然古者百畝之田匹夫耕之足以供一歲之食環廬植桑女修蠶織足以供一歲之衣瓜瓠果蓏雞豚狗彘毋失其時足以供日用之費而冠婚喪祭務從儉約鄉黨隣里不起爭訟故一歲之間用錢極少戰國之時民多背本逐末費用漸廣李悝有言曰一夫五口一人率用錢三百五人終歲用千五百社閭嘗新春秋之祠用錢三百然一家之內常費猶不滿二千若以今時較之儻能自蓄雞豚足以供春秋

之祠自勤桑蠶又可省千五百之費此外惟有輸官一節耳其餘省事省費無所用錢雖云穀賤何傷於我太守非敢虛辭以相勉此古人已行之事載在書冊爾父老明聽太守之言歸語爾子弟相率勤農出作入息夫耕婦饁不辭三時之勞可享卒歲之逸閨門之內仰事俯育含哺鼓腹而有骨肉團樂之樂鄉黨之間出入相友疾病相扶而有隣里輯睦之歡租賦早輸則無追呼之煩詞訟絕息則無請囑之費父訓其子兄訓其弟子

子孫孫克守其訓再登三登世為太平之民不亦善乎
古詩亦曰自今以始歲其有君子有穀貽孫子于胥樂
兮貴賤不同理則一也父老尚聽之哉

福州勸農文

八州之地福為最廣而人亦最稠農家之子去而從釋
氏者常半耕夫焉邑十有二瀕海者三之一負山者過
其半負山之田歲一收瀕海之稻歲兩穫民無甚貧而
亦無甚富歲無甚稔而亦無甚儉其俗不侈不陋而率

稱是蓋瀕海則資水利負山則仰泉脈霖雨太溢則兩
獲者微傷而負山者倍熟驕陽為沴則一收者易損而
瀕海者倍收二者雖異也然爾農於此則不可以不勤
太守承乏是邦行一暮矣去夏闕雨有禱隨格入冬雨
濕久閉忽開已而歲得中熟春前一夕臘雪彌山立春
之日朝陽散彩仲春以來土膏沾洽此又今歲宜麥宜
稻之應爾曹可不知所勉毋游于觀毋憚于勤毋舍本
逐末毋喜鬪好訟是穠是蓂不為水旱輟耕則東作而

西成負山瀕海何擇焉父老其勿以太守之言為忽

再任隆興府勸農文

予與洪民若有夙昔去此六年蒙恩再至父老攜幼迎予近境予揖父老問勞亡恙涉春禱雨食不下咽夜聞簷溜披衣起視日冀霑足慰我農人二月既望勸相于郊予心汝知予言汝聽不尚嚴刑不事苛斂不興橫役不縱黠吏有一妨農必戒必戢農之自妨蓋亦反思母習游手毋好珥筆毋屠毋沽毋博毋鬪予之戒汝非獨

今日人心本善久而益信土脈膏動倣載南畝序乃錢
鏞深耕易耨修迺陂塘有備無患人力既至天時可必
乃亦有秋百室盈止適我願今年豐何憂抑又有言悉
為汝告興配有教力田有科取士於農以其志純語而
子弟耕養之暇俾習詩書則知孝悌然我髦士此其選
也予言非迂諦聽毋忽

游澱山留題

嘉定改元中秋月夜衛清叔拉龔立道朱景淵觀潮道

褐夜已半乘興泛舟二十里澱山湖風露浩然明登山
寺挹晨光景氣清絕飯已回櫂薄暮夷猶蓼岸蘋洲之
間買魚更酌相與樂甚復載月而歸進叔仁叔正叔曾
叔偕行撫楫樵模樗侍越明日書此以寄佳山悟老

福州屏山亭題識

古語云君子之居一日必葺郡圃累政葺治稍覺成趣
參政何公廣曠宜創越山洞天尚書葉公闢柳塘雲觀
侍郎蔡公重修葺宣樓屬以修廊予丙子初夏時事登

覽樓觀燕堂後有萬象亭石林葉公所建危峙城上樓
觀相望亭之外瓦礫蕪穢雨輒不可往來遂續行廡複
閣凡至怡山間不論雨晴公餘可以縱步極暑夜坐露
氣襲人城隅有月臺就址結亭以四山環繞如屏名曰
屏山洞天畧高其楹名曰雲關萬象之東仍翼以廡始
稱扁榜文山鄭君育所書花塢循舊徑鋪石夾埽庶能
久欄楯亦以便遊觀也獨雲關至澄瀾廡未周以病丐
祠不果後之同志者嗣而成之

欽定四庫全書

後樂集卷二十

宋 衛涇 撰

詩

送蓋少卿晞之赴太平州

三釜果何樂萬鍾豈云輕當知昔賢士及親乃為榮憶
昨使東淮循陔蘭芳馨維先司徒公大篇寵其行喜我
諧祿養勸之力身名俛仰四十載歲月何崢嶸髯卿世
濟美中外稔踐更勇退甫宴娛起家俄詔徵秩真二千

石選授參陪京時哉春陽中光風助嚴程歌庶盛襦袴
迎伋森旆旌矧伊太夫人九十顏如嬰朱轡從板輿此
樂誰能并緬懷平生好相友真弟兄我今抱永慕撫舊
祗愴情塗山古名邦官府號太平故秋適淫潦所至多
疲氓政須事安集未可施敲榜長江戍水犀形勢足干
城時雖急規恢不用邀功能君年壯於我宏圖在南溟
報國豈憂晚事親宜竭誠道院日餘暇北堂慶方增戲
綵供笑聚捧觴壽期齡孝立忠亦遂俗美政易成奏最

亟歸來勿云厭承明

張德輝以詩見遺需酒因次韻解嘲

廷評一石了獄事謫仙一斗百篇詩君才盤盤壓今古
肯使英名誇昔時濁醪妙理清有聖此意豈復達士疑
我慚臄腹怯鯨量吐吐隱几成書癡

舟行遇順風

畫船昨日吳江西風雨滿江鼓棹遲客帆過眼撇波去
坐看舟子相猶夷今朝風忽發東北縱帆如飛揭百尺

來者寸步不可前停轡悵望求弗獲風從何來天何為
順喜逆怨人自私世間萬事亦爾耳乘除妙理君安知

呈張德輝

韞櫝君子藏枉尋吾道曲絕物忌太清徇世未免俗人
言俗難醫我見清可濯安得直上挽天河一洗俗塵千
萬斛

為楊仲起壽

天台高壓東南州秀鍾千古生公侯君才槃槃第一流

學優顏閔卑由求天意端為斯文憂妙齡掉鞅從英游
筆力挽強回萬牛金玉精美價未酬文章從古天地讐
演起大業難延留騰驤萬里須騏驎行省大對悟凝旒
擢冠多士騎鰲頭歸來雙親喜氣浮充間佳瑞樂事修
煙霄袞袞殊未休整頓乾坤攄壯猷策勲稷契伊呂周
請公為酬白玉舟他年名遂高千秋却揖劉阮尋浮邱
上親庭壽

中興申甫來高崧卜人吉夢占維熊生賢應有造化工

吾家積善慶所鍾公跨鸞馭從蓬宮襟懷廓落凌秋空
居鄉惠愛先困窮譚笑萬戶生春融在官履行潔且忠
此心須信天可通福善有道非濫蒙歲寒乃知栢與松
從今風虎依雲龍扶搖萬里乘長風結知丹宸恩厖鴻
金貂赤舄華吾宗尊榮安壽仁之功從教綠鬢宜方瞳
義方垂教慚倥侗青氈欲使揚祖風勉策駑駕追逸蹤
它年樂事來迎逢燕山嘉譽難獨隆宴堂清曉祥雲濃
槐庭晝永陰重重千歲風月誰與同敬祝王母偕僊翁

元日到湖上

勲業須年少棲遲祇自憐
若為車阨首未試翼垂天
拭目看新厯傷心惜去年
湖山一舒嘯春信滿梅邊

次德茂沌中韻

沌路隨江轉疎籬西岸斜
寄身千萬里慰眼兩三家
老矣思為圃歸歟學種瓜
遙知荷鋤倦一酌散腰麻

挽高宗皇帝章四首

大業高千古斯文炳六經
無刑深帝澤不戰壽生靈
神

聖非殂落乾坤有晦冥難名是天德刻畫謾丹青
致治勤三紀怡神壽九齡玉卮傳漢殿寶冊煥堯庭慶
事方頻舉哀歌詎忍聽萬邦惟戴舜億載奉慈寧

歷數千齡在謳歌四海歸地雄元帥府天授上皇衣洗
甲乾坤淨投戈日月揮成功有如此今古獨巍巍

江右龍飛後臨安日暈時煌煌周禮樂肅肅漢威儀魚
水君臣會耕桑父子嬉誰歟老文學重述中興碑

悼外姑安康郡太夫人章氏

有美夫人德家齊周召來義襟賙梓里孝養備蘭陔爵
視三槐貴年登九袞開追榮知未艾卿月近公台

鷄犬相聞地湖山百里間自憐同子姓無復恃慈顏薤
露聲徒切靈輜去不還擬為臨穴慟哀淚已潛潛

悼倪尚書

歷事三朝久清居一世尊心惟在王室手不炙權門橫
浦流風好香山逸興存經綸未渠展此意向誰論

舊草揚庭制旋高曳履聲胸襟忠憤切官職去留輕定

力鰲為動浮言蜮自鳴太玄從白首性地轉分明
入館論心舊同朝託契長鱸鄉各歸去鷗水久相忘正
喜山中隱俄傳橘裏藏遺銘最奇絕讀罷淚淋浪

長沙鹿鳴宴送諸進士

楚材從古擅豪雄況是長沙世著忠鳴鹿三章新得句
搏鵬萬里穩摩空科名直寄文詞表事業相期氣節中
畎畝平時憂國念盍將長策沃宸衷

上皇太子壽

有叙

某竊以壽星八月而明瑞紀秋銅之旦元良萬國以
正禮嚴端冕之朝喜動君親慶綿宗社恭惟皇太子
殿下畫堂毓秀朱芾呈祥屬金行沆瑒之時稟玉
裕溫文之質承顏聖父六章光步障之詩繫望函
生四德過樂歌之贊與齡有永施祉方新某昔綴
宮僚茲分藩閫莫與商山之老同侍賓筵願譜唐代
之詩載揚儲德謹賦拙律二首仰祝遐算千秋冒瀆
震威俯伏渙汗

嘉辰鷄戟瑞煙高
蒼震丕承九廟祧
駕天吳彰海潤
氣涵雲漢毓金昭
分陰資善時稽古
辨色含元日侍朝
欲識斯心仁壽處
謨參聖父五兵銷

南極秋中夜有輝
經旬先與玉衡齊
祥開遊震天方眷
德懋元良日自躋
風爽銅聲諧戶御
月明銀鏤濕宮題
遙知侍宴歡魚藻
曾忝賓筵漫舞醺

為樂提刑壽二首

千里瀟湘秋氣清
使星高並壽星明
雲槎端向銀河上

仙桂真從璧月生好善優優樂正子騰光焰李長庚
會看初度稱觴後徑駕鋒車入帝城

繡衣持斧按蠻荆三見門弧喜氣盈孟子能令索粟發
不疑更使漢刑平好將兩手摩銅狄長對三秋正玉衡
聞道中宵思賈傅江湖未可老鱣鯨

為運使蔡國博壽二首

橘顆園僊飽紫芝菊潭釀酒拍金卮九秋沆碣成功日
六轡光華初度時試問江湖勞漕輓何如朝夕密論思

預知來歲生朝後便著宮袍拜赤墀

西山南浦氣葱葱夜擁長庚粲碧空
惠露昔霑江漢表使星今照斗牛中
晚粳已喜霜前熟宿麥應從雨後豐
十一州人還得飽繡衣壽筇與民同

古林邱

支筇來訪古林邱轉盡山腰俯碧流
峭壁千尋懸石磴蒼崖百尺護龍湫
行人跡斷煙常暝過鳥聲閑意更幽
小憩已銷塵俗慮溪山奇絕是茲遊

晚晴

雨斷風回忽報晴
山顛初日掛銅鉦
雲烟藏迹千峯翠
草木增華兩眼明
桑野枝空蠶杼歇
溪泉溜急水車鳴
鳥啼花笑渾如喜
此去山齋只一程

沈氏書堂

東山風景壓東吳
更築書堂映碧梧
詹尹詩存家有寶
齊齋記外更無圖
洗除紈袴為緇帙
掃蕩膏粱入澤臞
早晚歸舟行雪上
青燈深夜聽伊吾

五日子刻立春

客中春到不知春，庭草青青入眼新。
對酒可無人作伴，照書却有雪為隣。
雕盤玉笋傳生菜，寶勝金花錫近臣。
我已棲遲寧事事，有誰曾為嘆長貧。

次德茂用惟直南樓韻

眼明仍見大江浮，貪看青山倚柁樓。
落日鷄豚秋保社，輕風蘋蓼晚汀洲。
長征倦馬思夷路，不下驚鷗避急流。
亦有琅玕何所贈，漫歌平子側身愁。

山行後觀及通鑑五代之際成敗得喪廢興之
跡因為感慨用前韻

溪山適興且閑行綠蘚蒼苔任點裳看鏡已侵雙鬢碧
憂時每覺寸心傷馳名擾擾終安用浩飲陶陶計亦長
千古英雄誰可問纍纍邱隴水茫茫

次韻呈與叔兄

野塘古岸飽經行風雨塵埃笑滿裳尊酒清江君意厚
片帆千里客懷傷出門求益謀何拙掃几觀書味更長

歸去飛蓬試回首一川煙水正微茫

次韻高仲貽贈別

金盃輕拋入釣船夜寒侵被不成眠
近傳奏疏三千牘今見新詩十二篇
故國音書憑過鴈江城烽火照晴天
移舟鐵甕城邊去信與名山舊有緣

月夜登吳江垂虹

平湖萬頃天無風試上垂虹月滿空
豁目直窮煙障外諸峯渾出有無中
混同天地纖塵絕倒影星辰萬象雄

却笑三山遊汗漫恍然身世到蓬宮

為師席李上舍去智壽四首

當時騎氣擁函關奕代清才擅謫仙
鼻祖嬋媽有餘慶至今名世更生賢

屢將大手占倫魁槐市英聲早四馳
肯與鱸魴爭尺水鷗鵬行矣化天池

道義須知耐歲寒論心還喜臭如蘭
龍鱗幸許同攀附乞與春風借羽翰

美景良辰幸與同
辦香聊以祝南豐
它年妙幹洪鈞手
盡納羣生壽域中

夜坐

深山五月清無暑
露氣溥空午夜寒
草際鳴蛩更强聒
滿懷秋思寄毫端

次與叔兄山行韻

陰雲凍合不成飛
行李留連歲律遲
山色宜晴更宜雪
別來應有憶山詩

與進叔弟策杖山行遣馬還孫氏

掣電追風古見稱
駕材空負渥洼名
何如手植青藜杖
雲屨風裾自在行

登寺中蕭疎極甚不見一僧獨坐雲堂數刻口

占

蕭條古寺僧何處
癡坐方床午漏長
怪我溪山慣來往
不惟魚鳥解相忘

張嵩拙軒憲寺用壁韻

金匱要略卷之二十一
卷二十一
幾陣涼風清不盡一天秋色渺無邊僧房好處閒窻牖
把定山椒紫翠煙

別吳荆溪

八載江湖甫召還深言應又忤天顏九重不見饑民色
只看先生兩鬢間

去年靈麓未空寒一客南歸不足歎學子今翻辭使旆
歸來只得片碑看

家數文章有路尋雲韶殊世不殊音小生不幸生來晚

纔識先生識水心

金鰻井詩

上彊鎮游精舍寺見金鰻井至一所崎嶇鳥
道古木陰翳仰視巖石壁立如飛來峯氣象
下枕溪流為龍母潭聞與鰻井相通

鰻井由來歲月深泓澄一鏡絕塵侵要觀變化神功妙
會見翻為旱歲霖

開化寺前古木數株葉密陰繁極可愛繫舟其

下賦此

古木蒼然幾歲周
摩空老幹陰溪流
舉頭未見征帆下
來向清陰繫小舟

憶環谷古梅

百花頭上春光到
雪壓霜欺意更奇
歲歲倚欄相望處
水邊竹外最南枝

故園一別換年華
客裏看花更憶花
昨夜西窗無限月
伴人春瘦一枝斜

小山遊翠峯寺攜枕席寄宿僧堂僧甚多而不
與人相接戲成

癡坐禪關日亭午靜看博山香一縷欲知世上炎與涼
三扣金僊三不語

欲至淞江送子寔聞潮早不果行小詩寄別

尊酒清江欲語離事多八九苦參差飛潮更捲征帆急
盡作西牕去後思

聞和叔撫琴

自少已月
卷二十
蓐收傳令待殘更斗轉參橫露氣清誰弄瑤池三尺玉
怪來萬壑動秋聲

皇帝閣春帖子

芳意傳梅信東風到柳邊王春在除夜明日是新年
綵勝黃金縷青絲白玉盤內家迎淑節先奉太皇歡
遲明魚鑰九門開警蹕聲清繞殿雷穆穆天顏應有喜
捷書新自北邊來

沈沈廣殿靡遑安玉食丁寧減太官野宿貔貅三萬竈

重裘應軫鐵衣寒

壽成惠聖慈祐太皇太后閣春帖子

一德坤元厚三朝母道尊
含飴供樂事戲綵見重孫
北內風光別僊家日月閑
紫皇天下養金母佳人間
柳色侵宮瓦花陰覆綺疏
鵲爐煙馥郁騰閱妙乘書
銀幡點綴闕宮嬪小字橫
斜篆縷新歲歲詞臣供帖子
從今便數八千春

文孫親上萬年卮如婦嚴粧五翟衣
不用都人須數蹕

內庭跬步即重闌

刁斗轅門五夜深思齊文母正關心身臨大練無他費
湯沐先捐鉅萬金

皇帝閣端午帖子

五日天中候南風物阜時三邊寬大詔億載太平期
御服齊官獻生衣暴室供金箱初進入一一耀黃封
日轂過亭午金徒緩報衙邇英催晚講分賜壺源茶
靈開玉壘靜無塵聖澤新覃雨露勻束縛仇頭藏武庫

梟羹不用賜羣臣

遠人新有約和書並塞狼煙指日無聖主憂民軫宵旰
宮中猶綰辟兵繻

壽成惠聖慈祐太皇太后閣端午帖子

清禁傳呼近紅雲擁紫皇菖花浮九醞請祝壽無疆
邊頭傳吉語井絡報平安今歲端辰別慈顏一笑歡
綵縷新纏臂靈符穩插釵永平多舊事閑教小宮娃

雙人翠艾垂朱戶三角瓊糜護箬衣聞道內家行樂祕

先將節物奉重闈

深宮永日鎮長閑
心靜多繡藥笈篇侍女身留香案側
旋燐金餅炷爐煙

人間無處避炎蒸
身在瑤臺最上層
學士大書金字帖
宮中巧篆絳綃繒

原跋

先公叅政文集七十卷皆樵執簡膝下隨錄日藥襲藏
者也先公平昔著述尚多而樵自入仕居侍旁之日少

於是彙錄之備諸弟之留侍者有馬孤苦餘生悲未裒
集樵茲來守永偶公暇因以所藏者纂類校讎又命館
賓嘉興貢士常南仲相與覆校敬鋟諸木而以櫟齋叔
父湜所編年譜冠諸帙首伊欲罄先公之遺文具載備
錄以至行述謚議史傳隧碑併俟它日續鋟木云紹定
壬辰冬旦嗣子樵謹書

